

erhalten werden, welchs der Christliche Leser mit vleis vnd ernst betrachten vnd daraus vrteilen wölle, wie man mit dem armen vnerfarnen hauffen vmbgehe sie zu bereden, als sey der streit von dem Nachtmal des Herrn Christi, wenn ein jeder seine eigene trewm vnd jrrige meinung von der Person vnd Menschwerdung Christi furbringt, so doch eben die gantze lere vom Nachtmal des Herrn dardurch vmbgestossen vnd zunicht gemacht wird. Diesen griff des Satans wölle doch vmb Gottes willen Christliche hertzen erkennen vnd mit vns beklagen, das es leider dahin bey vielen komen, das man die Lere vom heiligen Sacrament des Leibs vnd Bluts Christi auff new ertichte, frembde vnd gefehrliche verfelschung der Artickel vnsers Christlichen Glaubens gründet vnd die Christlichen Gemeinden von der stiftung vnd einsetzung des Testaments Christi vnd von den Worten der verheissung Christi abfüret, dahin man doch als zum rechten grund sich halten vnd dar-[108v] aus von der gegenwart Christi im Abendmal handeln solte.

Es wolle sich auch der Christliche Leser vmb dieser hohen vnd wichtigen vrsach willen nicht lassen bewegen, die zeter vnd mordio geschrey, so wider trewe Lerer in dieser Lande Kirchen vnd Schulen auffbracht werden, als were man von Lutheri Lere von der gegenwart des Leibs vnd Bluts Christi im Abendmal darumb abgewichen, das man den gefehrlichen vnd schedlichen disputationibus von der vbiquitet vnd reali Communicatione Idiomatum nicht beyfal geben wil vnd es viel mehr dafür halten, das Lutheri meinung durch diese frembde disputationes gantz vnd gar verloren vnd hinweggeworffen wird.

Daruon wir denn hier vnten widerumb zu reden haben werden, wollen zuuor kurtzlich erzelen, was wir für bedencken getragen, bis auff diese zeit vns der erregten streit von der vbiquitet nicht teilhaftig zu machen noch alles, was ausserhalb dieser Landen disputirt worden, zu billichen vnd nachzufolgen. Als Herr Philippus Melanthon noch am leben, wenig Jar vor seinem seligen absterben, haben sich die disputationes von mitteilung oder wesentlicher ausgiessung aller Göttlichen eigenschafften in die Menschheit Christi vnd von gegenwertigkeit Menschlicher Natur des Herrn Christi in allen dingen vnd Creaturn im Himel vnd auff Erden, daraus den auch die Artickel von seiner Auffart gegen Himel vnd sitzen zur Rechten Gottes auff einen neuen verstand gefüret worden, ausserhalb dieser Lande erstlich in geheim vnd noch nicht in öffentlichen vnd publicirten scriptis begeben. Vnd als dem Herrn Philippo daruon bericht geschehen, hat er nicht vnterlassen, trewlichen dafür, aber doch, weil es noch in geheim gehalten, priuatim, die so darmit vmbgangen, [109r:] zu warnen vnd sie zu vermanen, das sie die hohen Artickel des Glaubens nicht mit newem frembdem verstand vertunckeln vnd